



BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM
KOMISIJA ZA PROMET I KOMUNIKACIJE
Broj: 01/6-011- 1152/03
Sarajevo, 22.09.2003. godine

ZAPISNIK

treće sjednice Komisije za promet i komunikacije Predstavničkog doma Parlamentarne skupštine BiH.

Treća sjednica Komisije za promet i komunikacije Predstavničkog doma Parlamentarne skupštine BiH održana je 22.09.2003. godine, u vremenu od 11,00 do 12,00 sati.

Sjednicom je predsjedavao predsjedavajući Komisije, Miloš Jovanović.

Sjednici su, osim predsjedavajućeg, prisustvovali članovi Komisije: Nenad Mišić, Ivo Lozančić, Muhamed Moranjkić, Selim Bešliagić i Adem Huskić.

Sjednici Komisije nisu prisustvovali iz opravdanih razloga, Milorad Živković i Ruža Sopta, te Izet Hadžić.

Sjednici su prisustvovali i, Ismet Šečić, u svojstvu predstavnika predlagača zakona iz Ministarstva komunikacija i prometa, Dželal Hasečić iz Direkcije za civilno vazduhoplovstvo F BiH, te Dragica Hinić, stručni saradnik u radnim komisijama Parlamentarne skupštine BiH.

Za sjednicu je predložen slijedeći

DNEVNI RED:

1. Verifikacija zapisnika 2. sjednice Komisije za promet i komunikacije Predstavničkog doma Parlamentarne skupštine BiH;
2. Razmatranje Prijedloga Zakona o zrakoplovstvu BiH (predlagač: Vijeće ministara BiH);
3. Tekuća pitanja.

Dnevni red usvojen je jednoglasno.

Ad.1.

Zapisnik druge sjednice Komisije usvojen je jednoglasno.

Ad.2.

Predsjedavajući Komisije, Miloš Jovanović istaknuo je da Prijedlog zakona o zrakoplovstvu BiH ova komisija razmatra u svojstvu nadležne komisije, te da je na prijedlog zakona amandmane uložio Momčilo Novaković. Potom je obrazložio navedene amandmane. Amandmanom I predlaže se da se u nastavku člana 5.2. doda tekst koji glasi: «Direktor i dva zamjenika generalnog direktora bit će izabrani iz reda tri konstitutivna naroda, vodeći računa o nacionalnoj i entitetskoj zastupljenosti.» Amandmanom II predlaže se brisanje članova 6.3. i 6.4., uz obrazloženje da nikakvi propisi ne mogu imati pravnu snagu zakona i samim tim postati sastavni dio zakona, te da se nikom ne može odobriti izuzeće od propisa jer postoji

opasnost da organ koji diskreciono cijeni konkretan slučaj, napravi grešku i postupi nezakonito. Potom je dao riječ predstavnicima predlagača zakona.

Predstavnici predlagača zakona, Ismet Šečić i Dželal Hasečić, ukratko su obrazložili Prijedlog zakona o zrakoplovstvu BiH. Istaknuli su da je ovo jedan od prvih zakona usvojenih na nivou BiH bez posredovanja Visokog predstavnika za BiH. Kako je predložen veći broj izmjena postojećeg zakona, umjesto izmjena i dopuna, sačinjen je prijedlog zakona u cjelini. U izradi izmjena i dopuna učestvovao je radni tim OHR-a, predstavnici BHDC-a, kao i entitetskih direkcija i usaglašeni su stavovi po svim pitanjima.

U nastavku je vođena rasprava u kojoj su učestvovali Selim Bešliagić, Muhamed Moranjkić, Miloš Jovanović, Ismet Šečić i Dželal Hasečić.

Selim Bešliagić predložio je amandman na član 3.2. , tako da se u drugoj rečenici iza riječi «operacijama» briše riječ «najvjerovatnije», a ostali dio teksta ostaje isti.

Predstavnici predlagača saglasili su se s amandmanom g-dina Bešliagića, kao i amandmanom I Momčila Novakovića, iz koga bi eventualano trebalo izbrisati riječ «entitetskoj». Mišljenja su da amandman II ne treba prihvatiti. Naime, naglasili su da EU-a i SAD imaju svoju regulativu i institucije u oblasti avijacije. Agencija na nivou EU-e u ovoj oblasti nije zakonodavno tijelo, ali je tendencija da vremenom preuzme tu ulogu, kada će i njeni propisi imati zakonodavni i obavezujući karakter. BiH će morati poštovati standarde iz propisa institucija EU-e i ugraditi njihove reference u svoje podzakonske propise, s obzirom da će to biti neophodno za sigurnost letenja na jedinstvenom evropskom nebu. Ti propisi će biti sastavni dio zakona, jer se radi o tehničkim pravilima kojih ima jako puno i primjenjuju se neposredno na engleskom jeziku. U vezi člana 6.4. istaknuli su da svaka zemlja primjenjuje izuzetke od pravila , pri čemu se misli na uputstva i vodiče koji se koriste u realizaciji propisa. U svakom slučaju, nema izuzetaka u odnosu na primjenu zakonskih propisa. Ovaj član stoga tretira pitanje izuzeća od primjene podzakonskih akata koje donosi BHDC, a ne izuzeće od primjene zakona.

Nakon okončane rasprave pristupilo se glasanju kako slijedi:

1. Principi predloženog zakona usvojeni su jednoglasno.
2. Glasalo se potom o amandmanima Selima Bešliagića i Momčila Novakovića.
 - a) Članovi Komisije jednoglasno su usvojili amandman Selima Bešliagića na član 3.2. kojim se u drugoj rečenici iza riječi «operacijama» briše riječ «najvjerovatnije», a ostali dio teksta ostaje isti.
 - b) Članovi Komisije jednoglasno su usvojili amandman I Momčila Novakovića kako slijedi:

U nastavku člana 5.2. dodaje se tekst koji glasi: «Direktor i dva zamjenika generalnog direktora bit će izabrani iz reda tri konstitutivna naroda, vodeći računa o nacionalnoj i entitetskoj zastupljenosti.»
 - c) Članovi Komisije jednoglasno su odbili predloženi amandman II Momčila Novakovića.
3. Potom su članovi Komisije jednoglasno usvojili Prijedlog zakona sa prihvaćenim amandmanima koji su postali sastavni dio zakona.

Ad.3.

U okviru ove tačke dnevnog reda Miloš Jovanović je informirao prisutne o obavljenom razgovoru sa ministrom Ministarstva prometa i komunikacija, g-dinom Dokićem. Mišljenja je da bi trebalo zatražiti od ovog ministarstva pisanu informaciju o aktivnostima na izgradnji koridora Vc.

U otvorenoj raspravi u kojoj su učestvovali Muhamed Moranjkić, Selim Bešliagić i Adem Huskić, izraženo je nezadovoljstvo saznanjem da Komisija kao nadležna u ovoj oblasti, nije

uopće informirana o navedenom pitanju. Svi učesnici su saglasni s prijedlogom predsjedavajućeg Komisije, da se zatraži potpuna pisana informacija o ovom pitanju. Na kraju rasprave jednoglasno je usvojen zaključak kojim će se od nadležnog ministarstva zatražiti da dostavi pisanu informaciju o izgradnji koridora Vc. Na sledećoj sjednici Komisije, treba obezbjediti prisustvo ministra, kako bi kao najinformiranije lice mogao dati sve odgovore na upite članova Komisije. Također, treba uspostaviti stalnu saradnju ove komisije s resornim ministarstvom, po svim pitanjima iz njegove nadležnosti, čime bi se omogućilo ostvarenje zadataka iz nadležnosti ove komisije.

Zapisnik sačinila:
Dragica Hinić


Predsjedavajući Komisije
Miloš Jovanović